

Dialectbijdrage Oktober 2008

Regelmatig presentere wieër os "Bie Wieze Van Sjpreëke", in de Trompetter. Vier nuëdige jieëdereë oet om hie aan deel te numme. Doer 'n sjtukske te sjriewe en noa onge sjtond e-mail adres te sjikke, of om 'ns langs te komme op een van os oavende; de 2^e moandig van de moand om 20.00 oer Schoolstraat 4 in Broenssem.

De roepsj

't Is sjaering en isjlaag
Zag de roepsj op zieëkere daag
Ich wed dat, ich dat kin!
En ze sjpinde zich in.
't Boete-leëve houw vuur heur toch ginne zin.
Jan Halmans

Roddele

Sommige luuj motte ummer get te kalle hubbe,
En es ze dan nieks kinne vinge dat woar is,
Blieve ze net zoeë lang dinke en dubbe,
Tot ze get gevonge hubbe dat volgens hun de muijite weerd is!
Dat sjlingere ze dan de welt in,
Oane noa te dinke, en dat is déks noch mér 't begin!

Zoeë wurd dan weer inne nuje roddel geboare,
Wurd d'r weer van alles vertilt dat nurges op sjleet,
Degene deë 't betruf heët al verloare,
Vuurdat heë zelf wit dat d'r roddel besjteet!

Dan wurd 't links en rechts noch get aangediekt doeër angere,
En wurd 't noch lestiger noch get d'r aan te verangere!
Want wie flot de woarheid ooch is,
Is inne roddel eenmoal geboare,
Dan is 't meteen good mis!
En bis-te es lijdend voorwerp verloare!

Soms doeërt 't joare, soms lukt het noeëts mieër,
Zoeëne roddel oet de welt te helpe en te verdriewe!
En wurs-te d'r mit geconfronteerd, kieër op kieër,
't zal dan een deel van dien leëve blieve!

En de roddeleers zelf hubbe de groeëtste sjpas,
Ze hubbe nieks beëters te doeën en hoale noch mieër oet de kas!
Ze vinge zichzelf hieëlemaal geweldig en het resultaat prachtig,
Zien zichzelf al zitte op d'r troeën, och wat zunt ze mechtig!

Mér loat os een gedachte neet oet 't ooch verleze,
Ins hubbe ooch de rodeleers nieks mieër te keze!
Want oeëts weëre ooch zie 't sjlachoffer van domme kal,
Want bedink: noa hoeëvaart kumt ummer weer d'r val!
Dan mene ze hoeëg te zin gesjtieëge en zulle ze deep valle,

In dat loak woeë ze angere ummer hubbe probere in te kalle!
Ron Logister.

Vol...

Wat houwe v'r vanacht 'n lol,
v'r drónke beer oet blik,
en woare alletwieë vol
d'r moan....en ich...
Thei Janssen

Drie Vlege

Drie vlege op ene sjottelsplak
Ich zoog ze doa sjtil zitte
Doe sjanpde ich mich de gezit
En dat zoge die vlege neet zitte
Wiel Roeselers

Besjermingel

Wen-ste in d'r auto sjtaps en een sjtuk gees vare,
Bewaar dan de rust en prebeer dich te bedare!
En mot 't dan ins get flotter goan, bedink dich dan,
Dat-ste noeëts heller mos vare, es diene besjermingel vleege kan!
Ron Logister.

Beuge in d'r wink

Ich leep ins durch ing greune wei,
woeë bónte blómme sjtónge,
de sjoeënste klure woare doabei,
en de lieëwerike zónge,

ze sjtónge in d'r wink te wege,
op d'r sjtengel deep te beuge,
om ginge brüek te kriege,
van sjtorm en ónweersbuie.

zuus 'ste soms inge sjtieve prengel,
deë dinkt dat heë 't hold,
brik 'te aaf aan ziene sjtengel,
is dat zieng ege sjood.

zoeë is óch 't miensjeleëve,
dinkt 'e dat heë sjtoer mót doeë,
en zich neet gewonne geëve,
dan geet 't hem döks eëvezoeë.

zörg dat'ste beugs zoeë noe en dan,
en prebeer d'r angere te versjtoa,
durch good te loestere wen 't kan,
't zal dich dan neet sjlechter goa.

Thei Janssen

Noajoarszon

't Is ene zondigmurrege en ich trampel oppe viever aa. Inne sjoëene noajoarsdaag is 't. De zon deut heur bis om de welt nog inne kieër in vur en vlam te zitte. De beum, in roeëd, geël en brons, helpe doa good aan mit. Get eënje sjravele in 't graas op zeuk noa get te eëte. Mit groeëte platpoeëte marcheerd ooch 'n zijwaan der doeërheër. Wat ene trampeleër; platsj, platsj, platsj ...; ze lup uëveral doeërheër en wat zich neet wiek duut ze aa gen zie.

Ich loop oppe viever aa en zieën wie de zonnestjtroale in 't water sjete en de luuj die drin kieke verblinje. 't Water sjittert en kluërt wie kristal. Ich zien de ieësjte mieëwe aa komme vlege en rundjes drieë boave 't water, 't geet sjillekes aa wintjer weëre.

Vreuger woar 't park ene toe gewasse kroam mit rododendrons, laureerkieësje en beum, veuël beum. Ich heel doa waal van. Om jieëder heukske woar 't 'n verrassing wats-te dan weer teëgekoams.

Noe is 't oape, ze zigke dat dat sjoëener is en modern natuurlik. Deë wiedzse blik deë ze noe van uëveral uëver der ganse viever has is ooch waal sjoëen, mer de verrassing is weg; joamer egelik.

Wiejer trampelend kom ich tussje de beum i. Doa vingst-e nog get van de vreugere sjpanning truuk.

Vanaaf de grondj bis hoeëg in de loch bis-te omsjloate doeër greun, 't sjtroalt rau oet. Klabussehoot, rododendron, laureerkieësje, hazelnuët en taxus sjlete mich in, in een gevarieerd pallet van vanallerhandj greune tinte hoe in 't roeëd van de kieësjkes van de huls en de gelderse roeës fel opkluërt. Onge inne boom zien ich 'n paar paddesjteul mit hun kup in oud-roeëd tusje bronze blaar oetsjteëke. Ich kiek nog of ich 'n auvermenke kan zieë, mer ich kan der geen vinge.

Mit zon in mien hart trampel ich weer wiejer doeër de sjeem van 't buusjke oppe zon aa. De zon die lacht en wilt zigke: "Werm dich nog mer 'ns aa mich, der wintjer kump der aa".

Wiel Roeselers

Is d'r Nieks zoeë verenderlik wie 't weer?

Nieks is zoeë verenderlik wie 't weer,
Zoeë wurd tenminste ummer gezag.
Mér weë heët zich dat dan oetgedach?
Want sommige luuj verengere eëve geer!
En doa in sjpilt 't weer toch gaar geen rol,
Want die luuj zunt van zichzelf zoeë vol,
Dat ze puur oet ege belang en aandachtikkerie,
Aansjleete in de vuur hun biste rie!
En of de zon noe sjient of de reëge oet de loch vilt,
Dat is egaal want hun ege ego is 't enige tilt!

Ron Logister.

Broamelesjem

't Fien zag mich mit klem,
"ich wil dit joar wer broamelesjem,
dus Thei gang ze mar plukke,
ze zint noe riep, dat mó't waal lukke",
Ich zag "ach vruike, 't is vöal te werm,
de bóksj plekt aan mieng vót, ocherm,
en van de zon doon mich de oge pien
höb'ste geen bietje mitlieje mesjien"?
't Fien goof mich 'nne zonnebril,
(deë ich angesj noeëts höbbe wil),

zoedat ich van 't sjerpe leech,
gee las hou in mien gezich,
en bin dus mar noa d'r busj gegoa.
Ich wós de sjtruuk genau te sjtoa,
en vuur de zon mich hou verbrank,
hou ich d'r emmer vol bis aan de rank.
Mar toes kreeg ich de wink van vure,
en höb 't óch nog döks mótte hure.
De haofsjeet van mien oogs woar roeëd,
Ich veulde mich wie inne idioot
De duustere bril makde roeë broamele sjwat
doavuur höb ich ze op mienge kop gehat
en bleef ich zitte mit miene flater
en höb nog ummer inne "broamelekater".
Thei Janssen

Doeë blaar

Ee gans kling zuchsijke
Va d'r wink
Dwarrelt hei en doa
Ee bleëdje
Durch d'r grieze neëvel
Noa gen eëd
En kumt óngehoeëd
Op 't broengelig blad
Van dat al doeëd loof neer
Jan Halmans

Mit Hart en Zieël

Went ich wanjel doeër ge veldj
Doeër de buusj of uëver de hei
Kan ich genete van de sjtilte
't Pure leëve oane behei
Oane sjrieëwerige reklames
Van hamburgers of beer
Ooch al mot ich zigke
Zon gleëske hub ich waal 'ns geer
Mer de manneer hoe op vier
Teëgewuërdig in 't leëve sjtoan
Kan me soms toch gaar neet volge
Aaf en toe mos doe 't loate goan
Dich nieks aa trikke van wat mot
Of angere zoeë nuëdig wille
Zit dich zelf 'ns oppe welt
En loat de sjtilte dich dan vertille
Want wurkelik belangriek is
Hoe 't op aa kumt in dien leëve
Dat is dich vruije om't klene
Wat dich mit hart en zieël is gegeëve
Wiel Roeselers

Allerzieële

Doa zit, op een vuur heur, te hoeëg benkske.
Ee paar roze gekluërde en ingevalle wengskes.
't Roeëzekrenske, de kralle bouw aafgesjlieëte.
De krelkes hubbe heur doer minnige sjtorm va 't leëve gerieëte.
De bibbere lupkes beweëge lestig op en neer.
Bie 't neëgste krelke vroeg ze; "Wie lang nog Hieër?"

Jan Halmans

Ooch de natuur sjturft

De reëge hink wie 'n gerdien
Uëver der zjwarte graafsjee
Dreuvig dromme luuj
Onge 'n perrepluu bie ee
De chrysante kup zint naat
Loate hun zjwoare kup get hange
Krek wie de luuj
Die bie 't graaf hubbe gesjtange
't Is es of de natuur neet durft
Zien bontje leëve te toeëne
't leed van de luuj begriep en
Mit allerhillige ooch 'n bietje sjturft

Wiel Roeselers

Allerhillige

De grafsjting zint gepoetst
en verseert mit blómme,
't weëd winkter,
gee blad miee aa inne tak,
de natoer is aan 't versjtómme.

In de kirk weëd noe gebeënd,
vuur ós leefste die gesjtórve zint,
die ruste in de kouwe eëd,
mit hat en zieël bemind,

'n Troan blinkt in ós oge
en dinke v'r trük,
wie wier ze vreuger zoge,
en dinke aan dat aod geluk.

Mar loat ós óch d'r aa dinke,
aan al wat noe besjteet,
doa mieë aandach aa goan sjinke,
dat is... woeë 't noe óm geet.

Thei Janssen

Allerhillige gedanke

I gen kirk doa zitte de luuj
In lange rieje neëve ee gereed
Jieëder mit zien ege gedanke
Jieëder mit zien ege leed
Wie sjtil goan mien gedanke
Oet noa dich miene sjat
Ich mot dinke aan al die joare
Die vier same hubbe gehad
Aan goeije tiede en sjlechte
Aan vruijd en ooch aan leed
Dats doe zoeë flot moos goan
.... Dat verdeende vier tweeë toch neet
Wiel Roeselers

Sjteek d'r kop neet in 't zandj

Sjteek d'r kop neet in 't zandj,
Went 't dich ins teëge zit!
Prebeer 't, zit dien zurge aan de kantj,
Dan kin-ste langer mit!
't Is gemakkelijker gezag es gedoan,
Mér toch mos-te d'r boave sjtoan!
Dien leëve geet tensjlotte wieër,
En 't wacht gene ene kieër!
Totdat 't bie dich weer allemoal lupt,
En zoeë kum-ste dan van de reëge in de drup!

't Is neet mekkelijk, mér alleen dan zal 't dich lukke,
Ooch de positieve zaken oet d'r boom van 't leëve te plukke!
En moch 't dich zoeë af en toe toch neet lukke, houd dan toch mood,
Want zoeë wie me zeët: vreug of laat kumt toch alles weer good!
Ron Logister.

Bie wieze van sjpreëke

Knoakedaag	-	Vrijersdag
Dat is voelvrouwluujssop	-	Pakjes soep
Ene in de oge treë	-	In een hondedrol trappen
Dan sjteest-e doa mit 'n gesjild sjtekske	-	Dan sta je daar met lege handen
Dat make vier burgemeester	-	lets opeten of drinken
Mit de groeëte hunj mit zeke	-	Met de grote mensen meedoen
Deë kumt sjtront tekort	-	Kan niet meekomen

Website : www.heemkundebrumssum.nl